

## 1 enformaziuns y termins

**Encuntada con la Bibia:** en lönesc ai 27 de ma ales 20:15 él te salf de calogna d'Al Plan na encuntada de reflesciun sôn la Bibia con signor Sepl Granruaz. Düc é enviés.

**Pelegrinaje:** l'Uniun porsones vedoes y sores dla Val Badia envieia en jöbia, ai 6 de jügn al pelegrinaje a Karthaus (Schnalstal) tal santuar de "Unsere Frau". lade y marena costa 50,00 €. La coriera peia ia da Longega ales 8:00. Prenotaziuns y enformaziuns cina ai 1 de jügn pa Rosa de Scionele, ☎ 0474 501629

**Conzert:** la Scora de Musiga envieia düc der bel al concert de concluiun en lönesc ai 3 de jügn ales 18:00 a Al Plan tal salf dles manifestaziuns.

**Conzert de onoraziun:** la Seziun cors de dljia tl'EPL-Ert por i Ladins envieia ala festa de onoraziun de Felix Dapoz y Lois Ellecosta con i cors Raiëta da La Val, le Cor de Dlijia da La Val, le Cor de Dlijia d'La Pli y le Cor de Dlijia da San Martin en domegna, ai 2 de jügn ales 16:00 a La Val. Trepes é les poesies che i dui scriturs á componü y publiché, dantadöt tal lingaz ladin. Gran mirit s'ái fat ince por les ciances ladines scrites deboriada (musiga de Felix y parores de Lois) co fej pert aldedancö dal reportore classich dai cors de dljia. Entrami é nasciüs dal 1938, ai é stés tres de bogh compagns de vita y ince de creativité. I cors portará dant les plü beles ciances.

**Sorvisc ai Jogn:** le SaJ organiseia endô en curs de preparaziun al ejam de trilinguism por düc dai 16 agn ensö, dal lönesc 19 al vendres 23 d'agost, dales 19:30 ales 21:30. Con le curs ciafa i partezipanc la poscibilité da se preparé bun al ejam de trilinguism, fajenn deplü eserzizi da scrí y baié bun le ladin dla Val Badia. Ince la gramatica y la ortografia fajerá pert dal curs co gnará tigní da Daria Valentin tal zenter pedagogich a Piculin (alzada sotletet) al cost de 20,00 €. Iscriziuns tres la plata dai proiecs [www.proiec.org](http://www.proiec.org). Enformaziuns te SaJ, ☎ 0474 523070.

**Teater:** "Stachio n'ó nia partí, teater por pici y gragn" sará da odei a Al Plan tal salf dla Raiiffeisen en lönesc 27 de ma ales 18:00, a La Val tal salf dles manifestaziuns en dedemesalema ai 29 de ma y a San Martin tal Istitut Ladin Micurá de Rü en domegna 2 de jügn ales 18:00, con Silvia Costabiei, Silvia Liotto y Roland Pizzinini, la scenografia é de Gabi Mutschlechner y la rejia de Erika Castlunger.

**ASC Mareo:** mituns nasciüs tal 2009-2010 co es enteres da soghé al jüch al palé pa na squadra dla U10 é der bel periés da contaté Paul Pisching, ☎ 347 5539149 o mené na e-mail a [ascmareo@rolmail.net](mailto:ascmareo@rolmail.net) anter i 10 de jügn.

**Comun de Mareo** - Comunicaziun dal zenter de reziclaje Ciamaor: al ven perié i zitadins da nia sciüre les "spraydosen" pa i bossi, mo pal ciomont da tosser.

**Ocio:** l'apoteca d'Al Plan restará slüta dai 10 ai 20 de jügn!

<b>Döt le bun a:</b>	Oliva Ellemunter ved. Ellecosta	* 29.05.1926
	Angela Pedevilla, <i>Bornech</i>	* 30.05.1939
	y a düc chi co á santennom y compless i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns** cina le **dedemesaledema** sera a Franz Rigo: ☎ 0474 500978 o ✉ [ploania@gmx.net](mailto:ploania@gmx.net)  
**Download plata:** [www.unitepastorala.org](http://www.unitepastorala.org)



# Plata dla Ploania La Pli de Mareo Santa Maria dal Bun Consei

Ploan: Signor Heinrich Perathoner  
E-mail: [ploania@gmx.net](mailto:ploania@gmx.net)

Calogna Al Plan: 0474 501006  
Radio de Ploania: 93,00 MhZ

UNITÉ PASTORALA



VAL BADIA  
[www.unitepastorala.org](http://www.unitepastorala.org)

Ann C

26.05.2019 - Sesta domegna de Pasca

n. 26

## Chel co m'ô bun, se ten a mia parora. Mio Pere ti orará bun, y nos abitarun pa d'el. Alleluia!

☞ St.Ap 15, 1–2.22–29 | Rev 21, 10–14.22–23 | Jan 14, 23–29

### Dal Vangelo do San Jan:

Te chel tomp á dit Gejú a sü discepui: <sup>23</sup>Sce önn m'ô bun, se tignará a mia parora; mio Pere ti orará bun y nos gnarun da d'el y abitarun pa d'el. <sup>24</sup>Chel co ne m'ô nia bun, ne se ten nia a mia parora. Y la parora che os aldiis, ne ven nia da me, mo dal Pere, co m'á mené. <sup>25</sup>Cösc ves á dit, ciamó dertan ch'i sun pa os. <sup>26</sup>Le paraclet, le Spirit Sant, che le Pere menará te mio ennom, chel ves ensegnará döt y ves recordará döt ci ch'i ves á dit. <sup>27</sup>I ves lasci la pêsc, i ves dá mia pêsc; nia desche le monn la dá, ves la dá. Osc cör ne dess nia se desturbé y ne dess nia s'la odei. <sup>28</sup>Os eis aldí, ch'i ves á dit: I m'an va y i vegni endô da os. Sc'i m'oresses bun, se ralegrasses, ch'i va dal Pere; deache le Pere é plü gran co iu. <sup>29</sup>I ves al á dit belo sen, denant ch'al sozedi, por ch'i roise a creie, canch'al sozedará.

### Oraziun dal de

*Periun! Dio onipotent, láscesse vire de cör la ligreza de cösc tomp de Pasca y aprijé zonza zede la ressureziun de nosc Signur, por che le mister de Pasca, ch'i festejun te chisc cincanta dis, formi y müdi nosta vita.*

*Do cösc te periunse por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.*

(Lezionar C)



☞ Letöres dla GRAN FESTA DL'ASCENSIUN DAL SIGNUR - PALSACRUSC:  
St.Ap 1, 1–11 | Ef 1, 17–23 | Ebr 9, 24–28; 10, 19–23 | Lc 24, 46–53

Edema liturgica dai 26.05. ai 02.06.2019

<b>DOM 26.</b>	<b>Sesta domegna de Pasca</b> <b>FESTA DLA CONERMAZIUN</b> <i>Filip Neri, Maria Anna</i>
→ 08:00	<b>gran messa</b> por dōta la ploania <i>oferta por i debojūgns dla ploania</i>
→ 09:30	<b>a Al Plan, salūde y ingres</b> dal Hotel "Sole" demez te dljia <b>gran messa</b> en onú dal Spirit Sant por crejimandi, toc y families y aministrazion dal <b>Sacramont dla Confermaziun</b> con <b>sig. Markus Moling</b>
<b>Lön 27.</b> <b>19:30</b>	<i>Augustin da Canterbury, Bruno</i> <b>funziun de ma</b> por perié do vocaziuns con l'Uniun dai Ei
<b>Ded 28.</b> → 07:45	<i>German, Wilhelm</i> <b>s.m. dai scolari</b> por † Angela Frontull y †† de Albert Rubatscher <b>s.m.</b> de rengraziamont dla vita de Matilde Frontull, Moradú
<b>Dem 29.</b> →	<i>Sisinus, Martyrius, Alexander</i> <b>de d'oraziun te familia</b>
<b>Jöb 30.</b> → 06:00	<i>dles Crusc   beat Otto Neururer, Ferdinand</i> <b>prozesciun fora Sares</b> danló <b>s.m.</b> en onú de Santa Maria dal Bun Consei
<b>Ven 31.</b> → 19:30	<i>dles Crusc   Petronila, Metilde, Aldo</i> <b>prozesciun fora Pliscia</b> , danló <b>zelebrazion dla Parora de Dio</b>
<b>Sab 01.</b> → 07:00 → 09:00 14:00	<i>dles Crusc   Iustin, Sciomun</i> <b>prozesciun a Curt</b> , danló <b>s.m.</b> por † Lois Pedevilla, Soröa <b>s.m.</b> do intenziun dla fam. Albert y Teresa Willeit, Ansele röa adalerch les prozesciuns dla bassa <b>Val Badia</b> <b>s.m.</b> do intenziun y por †† Albert y Sr. Magna Willeit <b>s.m. da noza dai nüc Daniela Feichter y Marcus Alton</b>
<b>DOM 02.</b> 08:30 10:00	<b>GRAN FESTA DL'ASCENSIUN DAL SIGNUR</b> <i>Eugen I., Stefan, Armin</i> <b>PALSACRUSC</b> <b>gran messa</b> ciantada por dōta la ploania y devoziun a S. Maria <i>oferta por i debojūgns dla ploania</i> <b>s.m. a Al Plan</b>
<i>ampola:</i>	do intenziun de Albert dal Festl
<i>ministronc:</i>	▶ da doman y domegna: <b>Andreas y Armin</b> ▶ da sera y domegna: <b>Alan y Fabian</b>
<i>i recordun:</i>	Frieda Feichter Senoner, <i>Santa Cristina</i> + 27.05.2010 Anna Giustina Ploner + 01.06.2010



"Nada te turbe": Gejú tól comié, mo romagn pa nos (Jan 14, 23–29)

**I ponsi do**

Gejú s'an va  
fisicamonter, mo nes  
lascia desco scincunda  
le segn de söa  
presenza: la pêsc dal  
Ressorí, y le Spirit Sant  
che i evocarun en  
Pasca de ma.  
Le cristian n'á nia tema y  
ne se lascia nia tó le  
coraji, gnanca canche al  
s'anadá che les cosses  
ne va nia: Gejú é atló,  
al á davagné cuntra le  
mal, y al é el co condūj  
la storia cuntra le travert  
dal ben y dla iustizia.

**I preii ensciö**

Signur Gejú, prinz dla pêsc, tō confortes tū amisc  
y con ei nos dūc: „No se teméde, iu sun pa os y  
mia pêsc sará te üsc cōrs”.  
Deidesse ch'i ponsunse a cōstes parores canche  
i odun scenes de vera y de violenza.  
Fá ch'i ne dubitunse nia de tōa empormetüda  
canche al se ven enmont che le mal la davagni.  
Consoleiesse tō con la scincunda dal Spirit Sant  
canche dōt ci co sozeda se fej gní dla ria löna y  
canche i sun tontés da perde la speranza.  
Cherdesse danö con la forza de to messaje de  
pêsc y d'amur canche nos portun discordia y  
somenun zizania.  
Fá ch'i dijunse ince nos desco Santa Teresa con  
fede: “Nia ne dess te fá gni confus, nia ne dess te  
sprigoré, chi co é amés da Chelbeldio n'á bria de  
se teme da nia.”



**Cari crejimandi!**



Gejú dij: "Iu vá dal Pere y periará le Pere ch'al se meni le Spirit  
Sant. Al ves fajará capí y recordé dōt cant ci che iu ves á dit."  
Con le sacramont dla Crejima completeia Gejú la grazia dal  
Spirit Sant ofrida tres le Bato.  
Cari Crejimandi, con amur y ligreza seise gnūs arjignés ca a  
cōsc gran mistér dla scincunda dal Spirit Sant. Al ves cherda y  
ves mena coi sacramonc y con la Parora de Dio y de Gejú.


I ves aodun n cōr davert y n spirit lominus por osta vita. Che la fede por Chelbeldio  
y por l'amur al proscimo pōi cresce y ester via te os.

Cōsc ves aoda

la Comunité con le Ploan



**Vita de ploania y de paisc**



**Le Signur se benedesci y ciari de os. Le Signur lasci lominé  
so müs sora os y se dá söa grazia.** (Num 22, 24-25)

La ploania i fej les miús aodanzas de benedisciun y fortuna ai nüc  
**Daniela Feichter y Marcus Alton** co se dá adöm tal sacramont  
dal matrimone en sabeda ai 1 de jūgn a La Pli.